

05/02/1997

14 bekas ahli Arqam dibebaskan hari ini

KUALA LUMPUR, Selasa - Semua 14 bekas ahli al-Arqam, termasuk dua wanita yang ditahan mengikut Akta Keselamatan Dalam Negeri (ISA) di Kem Tahanan Perlindungan, Kamunting, Taiping akan dibebaskan esok.

Mereka ialah Nasiruddin Mohd Ali, Mohd Fakhruddin Arrazi Abdullah, Pahrol Mohamad Juoi, Ahmad Salim Omar, Hashim Ahmad, Hashim Jaafar, Mohd Nizamuddin Asaari, Jaafar Ahmad, Hashim Mohamed, Tengku Noriah Tengku Abdullah, Azura Md Yusof, Mansor Mohd Noor, Sheikh Abdul Rahim Sheikh Ahmad dan Mohamad A Bakar.

Mengumumkan senarai mereka yang dibebaskan itu malam ini, Timbalan Menteri Dalam Negeri, Datuk Seri Megat Junid Megat Ayob, berkata mereka dibebaskan mengikut Akta Kediaman Terhadap (RR) kecuali bekas Timbalan Pengarah Jabatan Tanah dan Pembangunan Koperasi, Ahmad Salim yang dibebaskan tanpa syarat.

"Setelah merujuk kepada Perdana Menteri, kita telah membuat keputusan untuk membebaskan semua 14 bekas al-Arqam yang menjalani tahanan enam bulan.

"Tiga belas daripada mereka akan ditempatkan di daerah tertentu manakala Ahmad Salim dibebaskan terus.

"Ini (tindakan mengecualikan Ahmad Salim daripada RR) memandangkan dia seorang pegawai kanan kerajaan dan kalau saya kenakan tindakan itu (RR) maka kemungkinan pencennya akan terbantut dan sebagainya.

"Jadi, kita pun ada perikemanusiaan. Dia mempunyai tiga isteri dan 13 anak dan telah banyak berjasa kepada kerajaan. Sementara yang lain, kita berasa mereka telah insaf tetapi kita masih perlu mengawasi pergerakan mereka," katanya.

Beliau berkata demikian kepada pemberita selepas menghadiri majlis berbuka puasa anjuran Kementerian Dalam Negeri (KDN) yang turut dihadiri Datuk Seri Dr Mahathir di dewan bangkuasi, Bangunan Parlimen, di sini.

Menurutnya, pembebasan itu menunjukkan kerajaan amat peka dalam melaksanakan ISA dan sentiasa mengikut perkembangan mereka yang ditahan mengikut akta berkenaan.

Pada 5 Ogos 1994, Majlis Fatwa Kebangsaan mengharamkan ajaran Aurad Muhammadiyah yang menjadi teras amalan kumpulan al-Arqam dan pada 25 Ogos tahun yang sama, KDN mengharamkan al-Arqam sebagai sebuah pertubuhan mengikut Seksyen 5(1) Akta Pertubuhan 1966.

Bagaimanapun, apabila pemimpin dan ahli al-Arqam tidak mematuhi keputusan yang dibuat malah bertambah aktif serta cuba mencetuskan keadaan yang boleh menggugat keamanan, 10 pemimpin mereka termasuk Asaari Mohamad dikenakan Perintah Sekatan mengikut ISA dan kekal sehingga sekarang.

Megat Junid berkata, semua mereka yang dibebaskan dikehendaki bersamasama menyertai program kerajaan untuk memulihkan pengikut al-Arqam yang lain.

(END)